

Di mana penguat kuasa?

Orang ramai persoal warga asing dilihat menjaja ala Bombay di tengah ibu negara

Oleh **NORAFIZA JAAFAR**
KUALA LUMPUR

“**D**i mana penguat kuasa Dewan Bandaraya Kuala Lumpur (DBKL)?” Itu antara persoalan ditimbulkan orang ramai susulan penularan video warga asing dilihat menjaja makanan ala Bombay di tengah bandar raya.

Video berdurasi 23 saat memaparkan jualan makanan jalanan dari negara India yang dikerumuni warga asing difahamkan beroperasi berhampiran Masjid Al-Bukhary, Jalan Hang Tuah pada setiap Jumaat.

Tidak cukup meja, kelihatan penjaja turut menggunakan sebuah troli pasar raya untuk meletakkan jualan yang mendapat sambutan dalam kalangan rakan senegara.

Penularan video itu mengundang reaksi pengguna media sosial yang kurang senang kelompangan sistem penguatkuasaan, seolah-olah terlepas pandang aktiviti penjajaan tersebut yang didakwa beroperasi sekian lama.

“Kita nak dapat lesen ‘berdarah-darah’ susah nak dapat. Dia datang KL boleh pula berniaga. Macam mana dia



Video memaparkan jualan makanan jalanan oleh warga asing berhampiran Masjid Al-Bukhary, Jalan Hang Tuah pada setiap Jumaat.

dapat lesen, DBKL tolong siasat,” komen pengguna Facebook, Yahya Othman.

“Elok juga kita jadi warga asing, nak buat apa bebas tak ada tindakan daripada penguat kuasa. Beruntungnya jadi warga asing,” luah Ven Tino.

Tidak kurang juga netizen yang berseloroh menyamakan aktiviti tersebut tidak cukup meriah tanpa hon atau bunyi bising yang kebiasaan didengar menerusi aktiviti sama di India.

“Tak cukup ummph lagi, kena ada latar belakang hon kereta dengan motosikal baru seronok,” seloroh Hazril

Md Isa.

“Tak payah pergi Bangladesh atau India, dah memang ada di Malaysia,” komen sindiran oleh pengguna Facebook, Lan Stylo.

Aktiviti penjaja warga asing nyata mendapat reaksi negatif orang ramai yang mempersoalkan aspek perundangan dan kebersihan makanan selain merosakkan imej negara.

Orang ramai mendesak tindakan tegas dilakukan terhadap golongan peniaga warga asing tersebut termasuk denda dan sita kerana mencemarkan identiti ibu negara.